

## Plattdutsche Nachrichten

### Plattdüütsch Nahrichten, 12. März 2010

Plattdüütsch Nahrichten vom 12. März 2010, [3:34] 

#### Papst befaat sik mit Mißbruuschaandaal

Rom: Bi den Schandaal, dat katholsche Mesters un Presters Kinner trakteren un schänneren deen, mengeleert sik vundagen de Paapst in. De Vörsitter vun de Düütsche Bischopkonferenz, Zollitsch, schall Benedikt den Sössteihnten verklaren, wat loos is. De Paapst is in de leste Tied jümmer wedder mit vördaag kamen, Gewalt tegen Kinner, dat is wat as de Höll op Eerden. Ook güstern sünd dor Minschen mit ruutkamen, jo, Karkenslüüd hebbt jüm maaleens ganz böös piesackt, dat is in 't Bistum Ossenbrüch un in dat Erzbistum Bamberg schehn.

#### Westerwelle sien Tour dörch Süüdameriko geiht to Enn

Rio de Janeiro: Bundsbutenminister Westerwelle is för een Wekenstiet in Süüdameriko ünnerwegens ween. Morgen will he trüch na Berlin. Politikere vun de Oppositschoon hebbt Westerwelle düchtig bekrittelt, wiesat he bi sien Reis Lüüd üm sik harr, mit de he good Fründ is. Düsse Lüüd sünd ganz groot bi Hannel un Wannel. De Butenminister säa, allens Lögenkraam, wat de Oppositschoon is, de will em bloots mit Fiesematenten an 't Fell.

#### Hölpsmaten vun Ground Zero kriggt Geld in de Hannen

New York: De Stadt will mehr as teihndusend Hölpslüüd, de na de Anslääg op dat World Trade Center eers Minschen redden un achterna Trümms bisiet schaffen deen, ünner de Arms griepen. Fierwehrlüüd, Gendarms un Muerlüüd, de nich good toweg sünd, schüllt alltosamen veerhunnertuntachtig Millionen Euro in de Hannen kriegen. Dorna schüllt se denn de Stadt ook nich mehr anklagen. De Hölpslüüd besweert sik, na de Anslääg vun de Verdüllten an 'n ölbensten Septembermaand tweedusendneen harrn se bi ehr Arbeit mit giftig Stoffen un unbannig veel Mull to dohn. De mehrtsen sünd an 't Stöhnen, se hebbt Asthma oder anner Wehdaag, wenn se Lucht hoolt.

#### Mann dootbleben bi 'n Fier in Loxstedt-Holte

Loxstedt-Holte: As een Huus in de Neegde vun Bremerhaben brennen dee, is dor 'n Mann bi ümkamen. Woso dat Fier in Gangen keem, hebbt se noch nich kloorkregen. De Fru vun den Mann hett sik versehrt. De Schaden an Saken, seggt de Gendarms, liggt woll wat bi tachtentigduzend Euro.

#### Paralympisch Winterspelen in Vancouver

Vancouver: Hüüt geiht dat loos mit de Paralympisch Winterspelen. Bi een grote Fier bööt se dat paralympisch Fier an. In de tokamen teihn Daag striden Sportslüüd uut veerunveertig Länner üm de Medaillen. Düütschland is mit twintig Mann bi. Een vun jüm is de Biathlet un Langlöper Frank Höfle. He het bi de Paralympics dörteihn Maal al een Medaille wunnen. Alltosamen giff dat fiev Slääg vun Wintersport, dor is wat as Rollstohl-Curling un Ski-Alpin mit bi.

#### Dat Weer

So süht dat rund ümto uut opstunns: Bi 'n Flegelhaben Bremen un in Demhorst dree Grod, op de Fischereehabenslüs Bremerhaben un in Willemshaben veer. Un ditt noch vun 't Weer: Hüüt düüster Wolken, dat dat regent, mach woll mit tachtentig Perzent angahn. Op dat Flach vun de Werser för 'n kotte Tied ook maal lichte Wolken. Bet söss Grod. De Wind weiht mit Maten oder frisch uut de Kant vun West bet Noord-West. Tokamen Nacht trist. Op de Oosten-Siet vun de Werser af un an Nisselregen oder Sneegrissel. Üm un bi een Grod. Morgen maal so un maal so, Wolken oder düüster Wolken. Hier un dor Schuers vun Sneeregen. Üm un bi fiev Grod. An 'n Sündag regent dat, bet söss Grod. Sowiet Nahrichten op Platt, trechtmaakt vun Sascha Sommer. Plattdüütsch trechtböög un vörleest hett se Ulf-Thomas Lesle.

Quelle:

[http://www.radiobremen.de/bremeneins/serien/plattdeutsche\\_nachrichten/archiv134.html](http://www.radiobremen.de/bremeneins/serien/plattdeutsche_nachrichten/archiv134.html)

12. März 2010